


Usaha penuhi aspirasi famili pendapatan rendah baiki hidup

Mendaki dedah dapatan kajian yang papar hasrat keluarga



KONGSI DAPATAN KAJIAN: Dr Yaacob (kanan) beramah mesra dengan Dr Mathew Mathews (dua dari kiri) sambil disaksikan (dari kiri) anggota sekretariat Kumpulan Pemuliharan Keagamaan (RRG), Encik Yusof Ismail; Ketua Pegawai Eksekutif (CEO) Yayasan Mendaki, Cik Tuminah Sapawi; dan Ketua Pembangunan Sosial Majlis Ugama Islam Singapura (Muis), Cik Muzaianah Hamzah. – Foto TAUFIK A. KADER

► NUR DHUHA ESOOF
nurdhuha@sph.com.sg

KELUARGA Melayu/Islam berpendapatan rendah mempunyai aspirasi tinggi melihat anak mereka berjaya dan menjalani kehidupan lebih baik daripada mereka.

Mereka menjangkakan kewangan anak mereka akan lebih stabil dan berharap melihat anak mereka belajar sekurang-kurangnya hingga ke menara gadging.

Demikian antara dapatan kajian yang dikongsi di Seminar Kajian II Yayasan Mendaki semalam. Kajian dua tahun itu dijalankan ke atas 22 keluarga Melayu/Islam berpendapatan rendah.

Ia antara lain bertujuan memahami keperluan dan cabaran harian serta aspirasi dan persepsi keluarga itu bagi masa depan mereka.

Kajian itu menunjukkan 16 daripada 22 ibu bapa menjangkakan anak mereka lebih stabil dari segi kewangan berbanding mereka.

Sepuh daripada mereka juga mahu melihat anak mereka melanjutkan pengajian ke universiti.

Menteri Bertanggungjawab bagi Ehwal Masyarakat Islam, Dr Yaacob Ibrahim, dalam ucapannya di seminar itu berkata kajian tersebut boleh membantu badan Melayu/Islam (MMO) menyemak program dan khidmat sedia ada mereka.

“Di masa akan datang, kita boleh ambil satu langkah ke hadapan dan mendapatkan anggota FEC (Keluarga Akrab) memainkan peranan sokongan dalam masyarakat lebih luas dengan menekankan perlunya peningkatan kemahiran selaras dengan inisiatif SkillsFuture,” kata Dr Yaacob.

Hasil kajian itu juga mendapat lebih 80 peratus atau 18 daripada 22 ibu bapa berkata mereka tidak cukup terlibat dalam pendidikan dan pembangunan anak mereka.

Kajian tersebut dijalankan oleh Penolong Profesor Adjung, Dr Caroline Brassard, dari Sekolah Dasar Awam Lee Kuan Yew Universiti Nasional Singapura (NUS).

Satu lagi kajian yang dijalankan Zamil Penyelidik Kanan, Dr Mathew Mathews, dari Institut Pengajian Dasar NUS, turut dikongsi di seminar semalam menyentuh FEC yang penting dalam pembangunan keluarga.